

獨行傳

神龍驤首顧盼千里士各有志倜儻自喜胡韜而姿務茲諛詭無待於外是謂足已哲人知幾誠之於思壹意孤行昨日今茲詩詠白駒莊寶靈龜紫芝可採白雲是怡纂獨行傳第二十八

宋

黃非熊號夢徵溪南人慶歷中讀書方廣巖下辟給事中不起有獵人告以巖上異境非熊剪荆剷險攀緣而上得大石室可容千人乃架閣三層不需片瓦風雨弗能犯巖前有千尺水簾玉泉洞瑞松塢諸勝不可名狀非熊作十咏傳於世自號南溪處士裔孫起熊字太占清順治歲貢淡於仕進不赴廷試有乃祖風(參舊志)

永泰縣志

卷十

獨行傳

梁熙衡京子內精明而外渾樸家中一使女與所私人潛逃熙衡戒家中莫追諸子不聽追至三日並獲其所私人欲送縣重處熙衡謂吾當親送之行至半途謂所私人曰汝亦人形何故爲此不法此去恐刑難受也其人跪云一時之差故至是然今已悔無及矣熙衡曰汝能悔乎吾不汝責也遂釋令去以使女歸閱月有狡獪人至熙衡門曰彼所私人乃吾姪也汝何故因使女殺吾姪以是枉熙衡熙衡不能辨與金三百不許徑至縣令前訴之適所私人出自呈其寃乃白而狡獪人熙衡弗之較也隣人顧念茲見熙衡田地殷富潛入本縣撥糧吞占熙衡田數十畝熙衡子四人皆才幹至縣令前分辨令械念茲坐獄責杖三十熙衡見念茲本隣居



爲己地受重刑不忍卽以所爭地與念茲諸子難之熙衡曰吾之地本多何需此且人能爲不善者其心難測吾以此除後患不亦可乎念茲本欲以此害熙衡既感厚德乃移禍黃某黃以念茲故延訟三年諸子始服父之識量(見蟬巢集)

黃雍字子劭號敬所新豐里人少慷慨有奇節知宋將亡隱居山中語及時事輒流涕滿面咸淳己巳九月丞相文天祥以詩招之使出雍度時事不可爲辭弗就徵然每誦其詩以語門生吳鑿不禁慟哭移時後七年天祥開府南劍復遣人物色之終不出卒於家(參舊志)

元

張中祥字雲祉家貧饗殮不繼或有所得糧肉必以頒其親從之老孤與寡者曰吾非能惠所以勸也授徒某地隣有豔婦來奔峻拒之詰朝徙館主人怪問終不言其故族有婁子欲出售其母冢地急給以直而止之子伯毅諸生叔震舉人(見蟬巢集)

明

陳文昂字自暉平陽縣令金之子早遊邑庠有聲宏治初應貢入太學授山東夏津訓導爲督學沈仲律所重秩滿以內艱去職及釋服慨然曰向者甘於薄宦圖微祿以養母也今母逝矣吾復有志於是乎乃徜徉林下詩酒自娛居二十餘年卒(舊志)

施絢邑諸生貧甚妻子耕織自給常夜坐看月上至月落不移相傳



其咏姬巖石門寒六月苔磴接千層之句張瓊贈詩有坐攬溪山勝不苦簡書迫握手就君談婉謝熱中客及吟囊良足豪新詩高盈尺云云(舊志參哦松齋詩話)

王琬號中坡赤岸布衣世襲千戶寧孫宏治乙丑以鄉團兵搜白水洞勦草寇黃胡四殘黨有功奏准縣職不就隱德弗耀遇卑幼未嘗輕出一叱咤暮夜不衣冠不見子弟工詩尤長填詞顏所居爲蠖窟以示終身不出之意著蟬巢集蠖窟詞鈔見者不知其故將種也吳航林舜舉過其家累月不忍捨見集序中(見王氏家譜)  
朱一六三十二都人安貧樂道不慕華膺隱其名不傳人以其一生有六嗜嗜碁嗜琴嗜詩嗜酒嗜畫嗜山水稱爲一六先生(舊志)

永泰縣志

卷十

獨行傳

三

參茸治雜錄

張啟建字有立由恩貢授永寧丞剛直守法後以子世堪早卒隱居不仕構讀書處於十都草堂老年詩文彌工世堪字與游崇禎庚午經魁詩文奇崛草書宗張旭爲邵劍津黃維章所推服(舊志)  
鄔炳字尚輝萬歷末補邑諸生天啓二年補太學生期滿授鳳陽縣主簿不耐腰折數月棄官歸不與聞邑里事以漁釣爲樂恬澹無求蓋其天性然也(舊志)

黃東字德脩一都人樂善好施自負節俠正統景泰以來邑罹兵燹民苦浮糧徵輸不前東憤然訴之當事乃免稅糧一千四百餘石明年又飢逋稅山積復親走京師上疏免稅糧一千九百石布政



使黃澤贊其爲一方偉人云(舊志)

張燦字自何號元丹邑諸生性孤狷不伍凡俗好詩文工古文篆籀以兄燧爲陳乃孥仇殺嘔血數升棄諸生遁入高蓋山紫頂終身不出(舊志)

張世宗字與登由選貢司京口郡幕署丹陽縣慈惠不忍行刑後解官閉戶著書寸楮不入公門(舊志)

柯立字四通性長厚好施與見義勇爲鄰郡山賊倡亂攻掠至本邑南偏馬守備統兵驅勦捐資千金充餉諸壇廟各鑄鐘鑪施田畝獨砌南山至湖裡亭大路四十里知縣袁世用聞於當道題給冠帶並錫好行其德匾額(參舊志)

永泰縣志

卷十

獨行傳

四

張啓魯字有傳由增廣生遙授訓導值明季堅辭不赴任嘗爲父母營窀穸迨扶柩到山其堂兄啓智已將已父母葬在壙中啓魯見之毫無改容卽就兩旁各造一壙葬親而歸戚屬咸稱孝友又有入鬻女銀遺失道旁啓魯問得其實卽如數還之捐己業爲上祖烝嘗族中有負公項者代爲賠墊卒年九十一(舊志)

鄔正亨字孔昇崇禎諸生丙戌後遂不應試或勸之行以無資斧辭或贈之卽沽酒命酌盡醉卒不行隱於深山終身不入城市(舊志)

鄭維埔字長熿專以義拯人之急子姓無依者爲延師訓句讀而供其脩脯之費兩舅氏捐賓客其子俱夭維埔迎外母於家奉養之



終身甚謹復撫其遺嬰婚嫁之每閔寒煖粥飯寡人寡人來就食者絡繹家人或稍稍生怨讟維墉行之愈益恬如終不爲易途有廢疾者輒躬步視問而厚遺之得歸骨者若而人（見陔南齋述聞）

汪瑞陽龍門人行事多關名教崇禎甲戌歲荒鴻聲嗷嗷思發諸鉅家窖粟而攫之擁粟者閉益堅瑞陽躬貸千金分給諸嗷嗷者非是亂且作至今遺事嘖嘖人口（參舊志）

王茂林號赤巖赤岸人諸生不二色不打誑語嘗授徒於外夜分有隣婦奔館中叩其故忸怩不能對麾之去有泄其事者詢之卒弗言晚貧蹇失志棄儒而賈同事烝信之見爲可任也而多依之有

賈在舍息羨可千金將他適不能携欲託諸茂林虞其昆季之弗類而耳目之近也納雜裹中弗與言茂林知之挈而付其妻曰好收此俄而訟事興辭連茂林將就讞語妻曰前此寄物者某也中有金千數其人至咨其審還之勿俟我訟既結茂林以病瘡客殂賈聞耗疾裝惚恍而來撫柩哭不止妻審之卽其人也自簾中出曰君勿愴先夫在日有遺訓矣妾安敢負諾責於地下君本寄金胡再不謀出原裹予之賈愕不能聲徐曰賢哉賢哉必有食其報者子元熺元煇元炯俱邑諸生元焄入莆庠餼滿得貢司訓休寧得士心（見續永陽清氣錄雲癘偶訂王氏家譜）

鄔茂林號紫山麟洋人諸生邱滿亂平謀善後之策議建義倉茂林



首輸粟五十石以倡明年脩故城推茂林董其役早暮不違城成爲力居多(見鄔氏家譜)

何正裔字其永邑諸生山寇竊發築堡以衛鄉里善賊邱二總縱掠赤洋一帶正裔率鄉兵敗之兵備道王公給賞有差(參舊志)

黃文輝白雲人初以豪貲喜爲德於鄉尤樂瘞暴骸家亦由是稍落嘗往五都萬石洋徵租行至小東坑遇數十人聚哭於道詢其故則福清飢民鬻私鹽期以鹽易穀鹽爲邏者所攫耳文輝曰無憂吾倉有穀恣若所取遂罄其廩而還後陳德培倡亂於三島溪文輝復以徵租至爲所獲索餉助軍貧無以應賊囚繫之適前鬻鹽者爲其爪牙感舊德爲言於德培德培亦素稔其名乃歸之(見

永泰縣志

卷十

獨行傳

六

黃氏家譜

廖全仁字而純號子東泰子年十七補博士弟子旋選拔貢常聚徒講學文行並勗束金而外毫不苟取節義之士多出其門事親先意承志刲菹魁剝豆莢必以進隱處深山中終其身未嘗干謁一有司亦不著書以要譽縣尹蕭侯私諡曰貞孝先生弟全禮邑諸生事父於蕉坪教子弟力農務本自食其力平常應酬人所逐逐者獨從容從事若不經意有與言官事者默不應(舊志參章治

雜錄)

黃勉字惟勤號隱山值明季亂讀書自樂不求仕進治家以禮自繩鄉里則之學者稱隱山先生莆陽林大黼守銅仁歸與勉文酒過



從稱爲知己子汝福編鄉團築土堡使隣寇戴子武徐朝文等不敢窺東湖匪患少弭

清

陳長者東坡人失其名賑凶荒卹勞苦興造巨役毅然任之無倦容亦無德色莆仙旅人德之爲之立碑迄今陳長者之名猶豔稱邑里間

鄢泓弓字德淵號去羞麟洋人生有俠性初補弟子員以仲兄覆盆之變挺身直焉當事受訐者肆罪其兄並怒泓弓移牒褫衿或勸令自直泓弓慮重傷兄心卒隱忍受誦後易今名試諸生順治丁酉以壁經領歲薦康熙壬寅廷選武平訓導一載奉裁復署教諭

永泰縣志

卷十

獨行傳

七

歸休林下宗人罹變飢饉天札白木纍纍泓弓於無後者爲營窀窆俾無暴露聞者義之(舊志參鄢氏家譜)

程奏公生平好義樂施康熙甲寅山寇李翳圍寨半月以窖粟散給衆食寨內無水衆幾莫支奏公夜縋而出自捐銀三百兩往二十四都杉洋請鮑李倪三姓計百餘人援救寇乃退寨內一族賴以生全(參舊志)

柯宜椿字任章號梅巖康熙丁卯舉於鄉自念起家儒業弗以案牘紛改教建寧士風丕振年七十餘告歸紳士歌詩誌別訂其集曰弋山崇雅雍正癸卯詔舉賢良方正府檄強起謁院優禮燕見獎賚有加旌匾曰壽愷作人乃以年躋耄耄無心仕進復膺恩典加



授奉直大夫優游泉石間以詩酒自娛非公不至爲邑宰所傾心至邑有利害則直言無隱前後二十餘年五代相見壽九十四子挺璠邑廩生能先意承志得父母歡心(舊志)

柯光榮縣古井人質直好義遠祖懋德以萬歷間重建有清涼寺年久圯壞光榮獨力任建粧塑佛像又砌清涼橋以上路約數十丈計共糜金四五千緡遠近宮廟橋渡罔不題捐祖墓自以時祭掃不以律諸昆季族戚中力與分所能爲者婚嫁喪葬無不代之籌措貢士陳紹馨輓以詩云世上幾人能看破先生之美不勝書(見韋治雜錄)

江埔字崇夫號德軒縣上坊人慈和樂易慷慨好施愛高蓋名山室

永泰縣志

卷十

獨行傳

八

之勝建魁星閣觀音亭鐘鼓樓諸所以供遊眺榜一聯云風捲珠簾鳳立臺前疑雨至日曛翠蓋仙人洞口覺天開凡道路輻輳之地置亭以憩行旅如巖下後余井後界竹口其尤著者也曹溪歇坪蜚英汰口東亨虎坑松灣水皆湍激悉造橋梁覆亭其上行者便之文廟傾圮念父世耀曾與脩建之功因引爲己任令次子釗更新之釗字茂公邑諸生贈迪功郎性孝友善承父志重脩文廟糜金逾千編脩謝道承文其石生平凡有益於人者竭力以濟而歷世皆兢兢於文廟尤爲人所稱頌云(舊志)

張瑛月洲諸生性慷慨賑粥施棺贈婚助葬至老不倦溪口義渡大澣溪橋皆獨力營之子謙乾隆初明經建蜚英石橋次起蟄劔坵



演義渡均綽有父風（見雲壘偶訂）

何泉泰號素園邑明經生平喜山水遊有一壑一邱供管領此身合是顧長康句其宅畔爲古松路古蹟與林也山陳韋治鄭鐵侯輩結古松吟社曾作東臬泛艇圖諸名流題咏其中林也山句云仙境在人世可遇不可求安知東臬艇不是漁郎舟

華有鑠字元明以俠義聞建霞蘇亨平橋並曹溪井後橫山坡各憩亭砌縣西出入大路乾隆甲辰歲荒有鑠極力賑卹一方賴以全活孫必蘭字君馨克繩祖武亦多行利濟事

張玉瑛字敬珍號紫石嵩陽人生平以財爲義舉擬設梧桐尾後池溪義渡大喜坑拱橋黃熊隔憩亭獨脩武聖廟倡建嵩陽文昌閣

永泰縣志

卷十 獨行傳

九

壽春寺兩捐義倉積穀董脩忠文廟募修縣治城隍廟天后宮節孝祠林駿倡亂以巨金辦團督憲程祖洛撫軍魏允烺會旌曰急公慕義子德淳諸生能繼父志

王錚號韞石赤岸人以太學累應鄉舉不售善能忍辱施捨不吝每歉歲或嚴寒輒設一大鍋與諸乞丐並貧不舉火者食隣里戚族喪婚無措者必給以資祖遺債券一束數約千金中有力不能還者亦有力尙能還者統付之火族豪某虎而冠者也債主雁行錚歲輒代償其券且爲之籌薪米市魚肉作守歲計意未愜再給之如其意乃去一夜昇一死屍門焉侵晨以聞錚偵知其圖陷而文弱莫奈之何給以錢帛陰使昇去隔宿復置諸門乃訴之有司某



既入囹圄錚仍挈銀周其乏冀或中悔則出其罪以敦夙好某手  
銀入橐而出惡言乃申訴而置之典比閭帖然始獲寧居（見王  
氏家譜）

張焜字望渠與兄煜同補弟子員餼上庠以真品實學爲撫軍汪莘  
農器重嘉慶庚午捷秋闈不應春官試有勸之笑曰做官乎不貪  
婪不發財不夤緣不上進二者皆非所願也親友贈北行金一一  
奉還自輓云善病得年疑天心之錯愛固窮正命守聖訓而何慚  
士論服其不夸（見螺浪錄）

林天培號植庭嵩陽人性慷慨尤隆重斯文戚鄰讀書有熟一經成  
一藝束脩膏伙諸費以身肩之無難色客或冠儒冠來者雖未謀

永泰縣志

卷十

獨行傳

十

面輒下榻以待酒肴豐腆咄嗟立辦終其身如一日

蘇鍾奇字大德號晴峰十都豐寧山人與兄鍾英同舉孝廉年未逾  
壯耳靜默寡言笑晨起正衣冠修容坐一室中非慶弔未嘗出戶  
雖接簷而居有經時不見其面者間有所之筮而後逞家人俟其  
歸跡可數也平居恂恂不見喜怒遇人無長幼必誠必敬惡聲至  
如弗聞視其容貌泊然無少芥蒂者酷信陰騭日以袖珍冊子記  
功過月晦於神前折除之雖橐筆入都南北奔走行李倥傯不廢  
林清瑞嵩陽人道光戊子優貢以施濟爲事歷署汀州教授莆田訓  
導任嘉義鳳山臺灣教諭並監海東崇文兩書院凡學田學租賓  
興廩糧等項前任所侵蝕自肥者悉更其爲又捐俸以益之秩滿



告歸值省垣災民乏食以餘俸購穀運省充賑局以濟飢民省憲慮粟少難以爲繼諭令回永採糴時永屬禁運頗嚴有汊口鄭登翰者瑞之同學友也豐於貲重瑞義爲運二十餘艘抵省存活甚衆子銘溥舉人步瀛進士懋祉翰林步先諸生

張觀海縣治人家奇貧一破甕代釜一破扉代臥具焉已耳而狷介特甚不以一毫取諸人嘗過蕉瀨亭有鬻女遺所得金觀海廉得其情遽還之既舉於鄉知縣某憐其貧餽數十金爲娶婦資辭曰吾年四十耳詎可以待盡韶華誤人子女乎卒不受竟以鰥終其身(見紺珠集)

劉錫三字懷琛盤谷人歲貢生守正不隨波靡而開誠布公一種謙

永泰縣志

卷十

獨行傳

十一

冲之度溢乎眉宇閩縣葉儀昌贈詩云光明心地不城府刊落智慧無機鋒(見哦松齋詩話)

侯春波蓮峰人咸豐紀元膺鄉舉家綦貧而嗜學不倦落筆警異爲人伉爽博大不爭瑣屑事無巨細當機應節靡不畫然居恆以排難解紛爲己任閭里稱爲長者

王寯號杰臣生而穎異雙瞳射人甫受書日誦萬言繼於諸史百家無不佔畢編綴尤留意於古今治亂成敗之原以周知其利弊膺歲薦後肆力於先賢語錄及坊刻善書格言夙興夜寐不少懈怠有挾重貲遊永者值道阻不得歸舉橐中金授之寯爲密致於家封識不少損張蘭石歿於商水任所寯輿櫬回閩閱關數千里囊



篋細碎無一遺漏每鄉隣有鬪爭事輒曰是非可以局外處者萬一葛藤未斷勢必雞犬不寧各鳥獸散必力爲排解渙若冰釋而後已智長力給非獨其精爽有餘意氣未衰蓋耳目之所營注手足之所蹈持纖悉煩猥莫不究殫備舉嘗謂王摩詰詩花落家僮未掃鳥啼山客猶眠照此做去豈不是中落人家局面詩人之言不可爲訓如此子森芝邑名諸生工吟咏多遊覽之作著斲輪集憶姑山房集鈔(見王氏家譜)

張琪年號瑞齋嵩陽人援例授浙江經歷調陞江蘇通判周急恤嫠無靳色嵩乏典肆每值荒歉貧者莫措琪年設臨時質肆較之官典息輕惟倍以所得運海米平糶好行其德又圖其可繼人以此

賢之

江文鎡號春菴莒口人咸豐辛酉恩貢倜儻畧邊幅超然遠矚邈然遐思飄飄乎遺世之懷浩浩乎如在皇古而上善戲謔而不爲虐雖童孺亦樂就之又好爲人排難解紛不得其平不已人亦非得文鎡一言雖平不樂也晚以辦團功保訓導不赴選

官秉鈞號樸齋莒口人洪楊之亂羣盜蠡起捐助防堵莒爲下江南來必經之地秉鈞於隔溪高洲山巔築土堡以防隣匪竄入某甲者以拳棒豪邑里脩睚眦之怨人噤不敢聲秉鈞訴之官繫繫彌月旣又爲之請釋甲遂改行作善士家致小康每對人言被懲事不少諱且曰非某無以至今日歲時饋遺不絕里有畜牛相者告



以不吉將殺之牛驚竄絕斷當者辟易見秉鈞作乞憐狀廉其情如其價給之豢之家而家且蒸蒸日隆子六人知名者五步瀛高陞偕瀛慶瀛捷瀛

陳立森字守蘭操履端方爲時推重郡刑名高登洲賢之聘課子讀暇亦間分筆札之勞有一獄成讞矣其人袖白金前謂立森曰請潛易爰書以此爲壽立森却之其人固哀不去至夕案上燈不移而易置詫異之因默祝如有憑之者當再行守視之燈果憑虛而行矍然曰吾幸不爲盜泉浼也既思刀筆之旁終非善地乃謝歸路見道殣裸臥解衣覆其屍醮資瘞之

黃乃清金潭人以明經任漳浦教職性嚴正家庭肅穆若朝廷子某年已逾艾矣而清在輒侍立不敢坐光緒間憲飭各屬實行捐輸頒有定額永邑各區均取次捐竣而南區諸紳方借題發揮大肆騷擾清適晉省驗勘取道縣城謁沈令具道各區捐款爲數已浮明府將以繁繁大才博長官歡乎令懼乃具文報銷

官慶瀛號藹士莒口人同治丁卯舉人以甄陶後進爲己任有以文字謁者雖百忙中必霽顏色親評隲以鼓厲之每歲新正虞子弟之或作無益害有益也輒集俊秀於龍山堂以詩鐘角勝負不至則督促之且從而譴訶之逾月始罷嘗曰若祖若父磨十數笏隲糜博半通綬身既至之彌願子孫踵至之身卽未至之尤願子孫之能至之也晚歲捐重貲擬建私塾莒口後山之麓未果而歿



周長守縣治獅峰人慷慨有大志思以讀書昌其門延師豐脩脯尤醉心歿慶果報之說雅好儒士里之寡人子有善讀者輒資助之至一切濟人利物之爲用之隱微而爲己所獨覺者尤爲指不勝屈嘗於齋頭見屬對中有欲療飢腸先種植能回俗眼是科名之句拍案叫絕每送子應試不售泣然曰余非悲兒輩之不成名悲余既老而積善仍未至也後次子遽然果舉孝廉迄今邑中談家法者猶於周門首屈一指云

張灝九號笠波少讀書過目輒解大意喜爲詩律屬對之學旁究青烏堪輿建除叢辰諸書器量翁受仁恕不苛浮沈閭里弗自標揭久困童子試援例入監常誦李安溪先生語曰吾平生無所不讓

唯讓之一字不以讓人

賴詩雲字餘攀小王坑人務農爲業儉嗇如常人而於父母兄弟延師睦鄰間則唯力是視常恐不及微特養生送死孺慕出於至性也猶子某析產有年矣雲構屋既竣召之同居又爲之謀婚娶歲飢乞糴於隣以贍族姻之貧不舉火者每老師宿儒過其家歛餽周至歲糜數十金弗之惜子在璣附貢生孫景阿廩生

許益謙號子牧三十六都蓋洋人爲善若不及言動一軌於禮弟兄析產土田則舍其腴而甘其瘠服飾器用則予昆季以良者而已取其窳者撫仲氏遺孤飲食教誨如己出爭訟不可平者不聽有司而聽許之一言不怵有司之刑威而以不得直於許爲恥以進



士起家出宰山西檄委寧武查辦積穀保甲事宜差竣而疾終旅次

楊鴻才饒於貲能以財爲義舉不齷齪作守錢虜態大溪三十六灣林木蕪穢萑苻散處寇劫時聞鴻才率鄉人火之砌官路二百餘丈柯楸隔一帶自是泯寇患廬傍衝衢異鄉人過其家歎留饋遺無虛日行人德之

林璋號達夫嵩陽人光緒間歲貢事關義舉以毅力持之如築義塚建書院設學校施棺木立拯嬰局之類均非徒驚虛名者

林奎號星齋一都人積餼貢成均逸志遠度曠如奧如不知塵世間有名疆利鎖足苦人事坐臥小齋幅巾杖履嘯咏其中茗香花氣晨夕相氤氳也足迹不出戶外者垂二十年江翊甫過其家誦廖仲詩云我爲虛名撻世網林泉高致總輸君

何際昇號瑞人蒼霞人倜儻自喜視尋常曲謹墨守偏隅者直欲坐之百尺樓下既舉於鄉卷懷不仕日潦倒醉鄉以抒其牢騷不平之概至其清糧弊版農會熱誠所激又非因人成事者比蓋不獨興酣落筆滿紙雲煙令人作三孟草聖想也

薛奮揚石鄰人堅忍有毅力以法政畢業任桐廬監獄獄中囚百數奮揚督以職業滌其汙穢下至米鹽瑣碎必親自寓目有染指其間者輒與爭由是以方嚴忤長官意看守者復從而媒孽之不兩載罷歸受永泰縣校聘遂貢精神於教育悉力盡校監職不稍事



姑息以譏叢脞未幾又籌設葛校任怨任勞獨力撐柱教員因假  
缺席者奮揚由縣垣赴葛冒暑往返數十里庖代積勞嬰疾旋逝  
年甫逾冠云

張惠猷家小康聘陳氏女既聘而女足病廢缺至脛父微以易娶示  
意猷曰文定之謂何如可改也是命自我造也有勸其納妾者又  
曰愛惡每奪於美醜衾裯別抱則相形見絀一不自持吾慮其奪  
之也執不肯鄰里多其義



論曰蘇氏子瞻云古之所謂中庸者盡萬物之理而不過今之所謂中庸者循循焉爲衆人之所爲夫必矯衆人之所爲固不得爲中庸而爲衆人之所爲又豈得爲中庸哉士之縱恣自是不可羈縻以衆人之爲者不必抱學於胸次者不凡而稟賦於天真者與恆人迥異也祇此不競於時不改於慮爲善於鄉若中流之砥柱屹然島嶼爭華嶽之隆獨善其身若逝波之入海千瀾萬折而不可回弗資灌溉之利其視世事舉若不足爲可否天下是非善惡當其意者無幾人及質其平生趣舍大節証之聖人或離或合求之輿論或毀或譽而離世異俗之操卒獨行其意罵譏笑侮困辱而不悔視尋常曲謹巽懦不自樹立者流直欲坐之百尺樓下彼

皆無衆人之求而有待於後世者也道微俗薄舉世方羣然以中庸自命間有一二縱恣自是則訾其過中或稍越繩尺則大快訐者之口噫士生三代後即使乘時得志其能不屈曲遷就而欲徑行其志以求事之有成者亦寡矣况吾人欲有所爲於鄉黨之間耶雖有不得志不可以繩尺拘此非好爲苟且之說以自便也自古材賢固有蘊於中而不見於外修於家而不獻於廷屈於彼而務伸於此者則際世變多故君子道消之時豈無負藝勇敢任俠高舉遠蹈沈淪於下泯沒無聞其引繩而直之絜矩而方之布算而乘除之未能悉協於中庸之歸耶抑列禦寇莊周所謂近於道者耶



孝友傳

父在爲子兄在爲弟大順同風和理日濟孝友之完斯爲至人可動天地可泣鬼神蕞爾十室苦衷自慰天性未漓難得可貴書紀克諧詩咏孔懷雍雍怡怡期與道偕纂孝友傳第二十九

宋

黃公槐字仲美龜年從子也乾道二年進士事母至孝未第時客遊於外賦北堂之詩曰北堂思親也瞻彼北堂在彼永陽白雲之下通化之鄉瞻彼北堂在彼永水白雲之下新豐之里北堂有子其實三兮仲焉此去其心慘兮詩刻於延平菴論者以爲南陔白華遺韻未仕而卒一本仕終迪功郎海豐縣尉（參舊志）

永泰縣志

卷十

孝友傳

十八

明

林榴春字見心邑諸生家貧事母至孝教授邑里童子有甘旨供者懷之以奉其母（舊志）

柯懋德字育吾由監生任富峪衛經歷以父老弟故棄官歸養撫姪如子既長家業與子平分凡橋梁道路寺觀損壞者捐資脩建勒石以祈父壽（參舊志）

林景明字希哲瀘川人性孝友力學厲行泊於嗜好宏治中授益陽訓導教人以孝弟忠信聞者油然自得居三載念母老卽棄官歸不忍離左右大尹鄭公數勸之仕曰人生貴樂志耳富貴何爲吾不忍季路之遺恨於南遊也杜門就養日以詩酒自娛居於邑治



之仁山著有仁山遺藁知縣文惠書其堂曰孝友(舊志)

林大畜泆口人與兄大有少相友愛嘉靖壬子大畜舉於鄉己未大有亦當貢適倭陷永城死之大畜痛兄殉難子幼愛憐之逾於其息知任縣執法廉明民懷其德及解任宦橐蕭然以先人田廬與兄子均分布袍葛巾不入城市至邑有利弊則謁邑大夫面陳不少隱云(舊志)

顧潮萬歷間歲貢官玉山訓導性孝友親病藥必親嘗衣不解帶者浹旬又以己田業代輸弟之逋負官玉山時卹貧却贄嘉惠多士卒之日無以爲殮士無遠邇羣奔喪助之(舊志)

林森然字宗盛十二都人弋陽藩府教授塾之孫森然幼失怙事母

永泰縣志

卷十

孝友傳

十九

惟謹撫其弟友愛獨至以貢授山東泰安州訓導課士以禮不規細利秩未滿卽致仕歸知縣某榜其堂曰懷哲(舊志)

邱汝瑤遭變與其兄汝琦相失瑤歸聞爲流賊所獲悲痛踰日出裝傾囊百計贖回值堂弟誤殺人罪當大辟瑤鬻產護救仇家不許謂能保殺人命者必先自投爲奴瑤慨然請衆立約願爲仇家奴以贖弟罪旁觀服其義爲之排解而弟得以免死

蔣士榛字仲美父早卒母林氏孀守榛事母至孝和顏悅色家貧養其母雖薄不拂母意母得危疾幾斃窮鄉無精於醫者乃齋戒禱天願減己算以益母壽母疾尋愈(舊志叅雲癘偶訂)

王元柱三十二都人失怙母老病篤元柱剖肝奉母病立愈縣令蔣



學純扁曰刲肝療母(舊志)

王宏中原名廷拱號梅川廣西教授鏜孫諸生源清子也生而知孝甫六歲祖鏜解官歸養詔賜羊酒到門私語其母曰兒以爲吾祖前此袍笏之榮不如今日及長剛介不阿工應制文補弟子員林起鳳尹瀘溪以錢幕聘不赴句讀授徒爲養雖貧窘奉親必甘脆自茹苦淡丁內外艱哀毀骨立罄重貲營窀穸哭墓詩有林鳥昔哺子今贖巢中雛瞿瞿猛然驚去年兒已孤孤兒拜墓門有淚和墨濡等語積雪嚴寒廬墓自若邁疾而歿(見韋治雜錄哦松齋詩話)

陳廷緜字公遠友愛逾常人父業悉以讓兄毫不爭競終其身蔬糲

永泰縣志

卷十

孝友傳

二十

無怨悔既老矍鑠有加年九十三屬纊前能預知其期命子婦具酒儀生祭酣飽坐堂上處置後事訖令哀俄而氣絕(見陔南齋述聞)

陳國禎字興將家貧事母甘旨不缺於供歲嚴寒敝衾如鐵或夜半熏籠不繼偕弟月將迭溫之而昆季二人則一領簑衣相爲偃倚焉已耳母病逾年日不交睫延醫購藥典質幾罄及卒哀痛悲號聲淚俱盡聞者悲之

黃文蒸與弟文熙兄弟天性友篤尤聰穎絕倫弱冠同爲諸生時羣盜蜂起文熙爲趙寇所執文蒸詣賊營願以身贖弟文熙義欲留兄守死不去同被害母池氏往收其屍罵賊不屈亦死焉邑人賦



詩以哀之後趙爲巡撫某公所獲棄市兄文熊購其兩耳懸於白雲之上街(見黃氏家譜)

清

游泰字漢章事母柯氏至孝邑令朱由榴爲舉孝子順治初母年九十賊攻永城城中居民驚竄泰以母老病不去皆遇害數日收殮顏色如生(舊志)

陳國受字以周清初定鼎匪氛未靖父遭寇遇害官軍適至國受年十五以狀泣訴主將緝獲賊數人令其辨識國受前指曰此真殺父賊也令手刃之國受揮刃斫賊者七梟其首致祭父墓向主將謝曰微公父仇莫報矣

永泰縣志

卷十

孝友傳

二十一

張可全嵩口人與父同擄於賊父倔强而全和婉賊欲殺父而釋全可全哀告願以身代賊憐而兩釋之人稱爲張孝子

董邦靖字守本大樟人七歲失母事繼母如嫡順治戊子海寇內訌父克肫被虜靖年十六奔赴寇營請代俾父歸納贖金六百兩曾許之父歸愆期未至曾怒將斬靖者三旁曾有憐其少者輒爲解釋適福清人陳必昌負義俠與克肫有故爲資金以償乃獲生還卒年九十一(舊志)

汪阿猷二十一都人傭工養母鄔氏母病三載擬割股以療家人勸沮曰股非藥需且毀傷非孝或曰豈真在股君子積誠堅冰且泮冬植且萌猷悟如或言以進母病果愈(參舊志)



黃順養父黃理生邑張氏僕也養順於襁褓長爲娶婦康熙十七年父病篤潛自割股和糜以進人不之知父卒順臥病其主人詢之妻始吐實驗之創痕宛然(舊志)

彭士錦字文卿九歲喪父事母孝家貧必力具甘旨以養母妻張氏產男值母病篤士錦令妻乳其母而哺其男親滌溺器嘗糞以驗母病及卒負土爲墳居廬以守號慟累月年八十猶孺慕弗衰又善養其叔署縣李拔卿舉孝子雍正六年奉旨建坊旌表祀忠義孝友祠(舊志通志)

張其斗字自揚邑廩生出嗣伯庠生世琳事嗣母以孝聞戊子寇亂兄其璧弟其翼皆被賊掠爲質索贖身金千五百兩其斗立鬻嗣

產得千三百金冒險入賊營以贖賊謂額未足先釋其璧又再搜括得二百金賚往遇賊劫之於途號泣而歸產已罄矣復百計措貸再賚往贖其翼乃得釋兄弟相持且喜且泣貲產一空弗恤云(舊志)

張其奎字自徐邑廩生父與覺順治四年由薦舉任廣東興寧縣教諭時鄭寇據閩以奎父臣清到家提捉奎語兄弟曰此去斷無生還之理諸兄弟俱未有子嗣我已產有五男雖死無憾遂往見鄭至則誘以崇秩堅執不屈遂見殺(舊志)

陳杭字豫木七歲時能奉湯藥比長貿遷於外忽夢父病馳歸父果呻吟在榻旣而喪父衣衾窳窳黽勉以圖不貽事後之悔爲戴縣



尹所嘉獎年九十不杖子見熊邑諸生(參舊志)

林應琦字幼瑋幼失母哭屢慟父輒多方勸止康熙丁酉祖祠被焚火方熾應琦突入祠抱合族神主以出置於己之居室火將及復負主走他皆不顧天忽反風私居獲保人謂孝感所致(舊志)

張其愚字白聲生母林氏壽辰屆期圖稱觴舉林以夫世壩在十都智谷別業欲遷焉奉母舟行風緊舟搖母暈跌溪中愚入水挾母出而愚竟死舉人江績誄以詩云力窮河伯身先死誠格天公母竟還(見張氏家譜)

林師孟字克浩嵩陽人天性惇篤康熙甲寅鄰寇竄入蹂躪井里子姪俱被擄索贖千金師孟營業僅得半數卽以贖姪或問之孟曰

吾兄克達仕粵卒於官唯留此子若不贖之兄嗣斬矣我尙存子卽不贖猶冀再生未幾其子竟死於匪孟後連舉四子壽八十六謝兆齡字紹任埔嶺人邑諸生事其祖以孝聞時山寇黃居掠其弟紹敬紹丹索贖身銀五百兩紹任立將已分產業罄賣得五百金冒入賊營以贖敬丹乃得釋斯時知有兄弟區區資產不計也曾孫隆啓字宜佑敬賢好士常厚幣延師課子姓及戚屬之貧不能讀者人謂無忝爾祖云(參舊志)

羅其顯八都文溪人兄其忠以事株連被逮顯聞之翌晨赴庭乞以身代繫令廉其情釋令歸母方氏病篤欲嘗麋肉顯無計可得割股給之病亦果愈



薛長齡字宜椿縣治人幼失怙攻書達旦不倦母曰汝父殤於是吾願汝延齡更切揚名也因自名長齡取永言孝思之義號曰思齋日以不識父爲憾一日忽見一著舊布袍長身玉立面色慘白自言與其父士衍交最深知衍詳談生平事鑿鑿質之母不少爽并出衍像相示齡持像白母倏忽已沒既選乾隆乙酉拔貢色養老母終其身如嬰孩歷任建甯教授尤溪教諭以敦倫諄諄爲諸生勗聞之有泣下者有思齋集杜詩偶評古文雅正補評藏於家江炳號蔚亭莒口人篤內行體羸善病年十五始學爲文乾隆丁酉以選拔貢成均丁外艱哀毀逾禮歷三年如一日身爲家督每事必稟承繼母而行且晚率家人朝寢門無少懈有期功親徙居小

圭鄉小圭老成凋謝炳以伯母命來襄家政而弟姪輩未嫻教訓酒食遊戲相徵逐其集中獨坐樓上句云本爲漏舟徐補罅豈知舊甕又封塵讀項羽傳云子弟八千都誤盡有何面目見江東蓋傷之也子景陽舉人知宜良縣見列傳景瀾景星俱諸生

張應中祀忠義孝友祠事實缺

張應亨祀忠義孝友祠事實缺

鄭玉瓚號霽圃事母孝每事必稟命而行母歿喪殯盡禮生平謙抑善下不以賢知先人皆服膺母教者有句云堂前慈訓日諄諄至今巷嫗猶能說逝水春暉杳莫追縹緲孤兒已頭白師事鄧畸人先生稱高足弟子嘉慶元年以廩生應舉孝廉方正士論翕然



林聿熙事親以孝聞母病欲割股和藥以進甫奏刀而已昏迷夢一老者授以丸曰母病服此當愈傷生非孝勿遽爾也醒持丸嚙母母後年八十餘無疾終

林希元

或云薛姓

小字甲官縣東關外人早孤事母至孝佞佛無他祝人問故卒不答竊聽之口喃喃者母健壽耳作小經紀有些贏餘便喜而謝佛意足供母甘旨也親友憐其孤露醮貲助娶有日矣繼而思脫有不賢將奈何宜置之卽將所餽璧反人有嘆且笑之者母年九十三卒拮据喪葬自是而後父母像前各設酒饌已對案而食時或懽忻時或悲泣見者舉以爲狂一日語其甥某曰我所囑汝當以某日來甥如期至門戶寂然排闥入見林衣冠趺化

永泰縣志

卷十

孝友傳

二十五

床上像前酒饌如平時香火猶爇也時嘉慶十二年四月初十日壽七十有七

陳飛春字高仲嘉慶丙辰恩貢親病羣醫束手飛春侍疾衣不解帶憂苦備至有丐媪自言能愈疾遺以莖草曰和人肉煮食自愈語畢不見飛春剗股撓藥以奉疾果愈題准旌表（見紺珠集）

余元暢字而遂年十九父卒上奉慈幃下撫弱弟勤勞備至旣而家益窘乃奔走殊鄉博贏餘以圖存活每過神祠必禱禱則萱幃強健之外無他辭值母病專足促歸暢急於侍奉夜行跌墜橋下亂石刺膚血涔涔赤潭水昏迷不能聲少頃有行者微聞呻吟舉火集視負之而上旣竟而潦漲暴至不逾岸者尺有咫耳時暢仍僵



臥岸上與夫尙未集也因共詫爲唯孝動天云

彭孝子者失其名縣治新安人賣漿爲業少孤事母至孝家極貧自餐藜藿必求甘旨以奉母居喪哀毀骨立如柴平日與鄉人處未嘗疾言遽色舉止嫻雅有古人風卒以貧故不能婚例不得旌黃敬容號誠齋白雲人以孝聞自奉惡劣而寢門務竭其誠有貨鮮及異味者給以若翁欲市也則得之不計直屢爲貨者所愚每飯躬親侍膳畢然後退數十年不少間

林伯理東關外人父字鴻以賣豆腐爲生伯理年十二日荷擔子覓主顧朝出暮歸以爲常父母命不逆不忘人無見其與同輩嬉及口出惡言者事叔父如事父叔父死期悲哀值父貲缺乏伯理傭

於人日得直購柴米歸以供膳羞已忍飢推故不食嘗積直易豆回有急故當去豆忽爲父傾泥垢中伯理從容拾淨母鄭氏患瘡輾轉床席九月拮据醫藥膿濁至以口吮妻勞瘵不任操作母巾裙廁踰伯理躬爲濯滌母卒棺衾無措戚里賙之哭幾絕父泣曰汝如是脫有不然吾將誰依卽收淚跪謝猶時時潛哭母墓父年老喜觀劇而不良於行每演負父往安頓坐處托親友調護訖歸作經紀演畢負回暇則對父談劇讀傳奇以娛父志道光初知縣胡之鏗錫扁曰順德性成

何作霖號兩村性孝友事親柔聲怡色得其歡心早歲懋遷省會父年老里居雖隔百里而時新甘旨輒寄罔缺迨父歿歲必旋里一



祭祭必哭三十年如一日也晚景時唯次兄梅林尙存歸家則兄弟聯床夜話漏四下猶不忍睡梅林年七十矣因感誦大蘇寄卯君句云與君世世爲兄弟再結來生未了緣作霖聞之淚下不止陳上珍字用坦孝友根於天性事父母能得歡心兄弟相處怡怡如也知縣左垣贈詩云哺烏苦憶將雛日題脊時厯急難情可想見其爲人矣咸豐三年旌獎孝友

華必紳字君書二十都人咸豐紀元舉孝廉至性過人父歿終喪每逢忌日必欷歔流涕事繼母如所生訓諸弟以禮不以噢咻爲友愛家庭肅穆無嘻嗃聲秉鐸寧化諸生月課親自改竄捐俸以獎勵之其有乖至性薄天倫者必抑置末等至今寧庠猶能道華先

生教澤著亦悅堂詩草未刊

鄔占春號梅村年十四隨父晉省甫至而父病占春窺其神色之異也請歸父弗允長跼榻前達旦父見之瞿然曰旣如是聽若歸耳占春翼以登舟途中病益劇焚香泣禱到縣急僱輿沿途籲天拜且泣三鼓抵家越宿而父歿(見鄔氏家譜)

凌奉璋字奉義號莪臣上潞人孝行純篤以監生應鄉試每以不獲揚名顯親爲生平憾事父病百藥罔效璋潛割其股以進光緒初邑侯旌曰奇孝驚天

力秉戡性至孝嘗割肱療親年十三往江南尋父三載始得之事實見林敬廬集中光緒庚子旌獎孝子建坊



陳鴻磐號諱如縣治人廩貢生少孤奉母存活於兄時祥家未幾而祥卒繼祥而理家政者弗善也乃賃屋而居舌耕供母甘旨之餘拮据娶婦亦冀寢門猥瑣少資內助耳詎婦患癩疾旋發旋止陳遂飲食湯藥責無旁貸卽巾裙廁踰澣滌垢汗必躬必親無腹誹無倦容非獨扇枕溫衾效黃江夏故事已也彌留時兄時隆撫而問之曰弟不孝今而後以母累兄矣無一言及妻子者

力朝綱號廷臣鳳祭人邑諸生窘甚年三十未娶也課徒羨金將爲婚聘計而糜於連歲父兄之喪遺孤姪三又呱呱待哺者或告以撫姪非計則斥之曰不娶爲無後也姪爲兄後非吾父後乎比姪能自謀其生紛紛析爨而朝綱遂老於鰥

張守曾號魯生邑諸生生平以不逮事其父爲憾母病侍湯藥罔懈比卒悲號累月哽咽不成聲淚竭繼之以血歲時致祭必躬必親每百十里馳歸弗爽也尤謹守先人遺訓勇於爲善凡關義舉惟力是視其卒也遠近惜之

張保修縣治人父兆禎縫匠早故母黃苦辛支門戶保修繼志述事俛焉日孳雖重聽親吻翁闈輒意會日定省者三每出營業牽衣作嬰兒狀戀戀不能捨遠人延至其家倍其值不往也處昆季間衣必共食必推與人語輒曰吾兄弟所以成立者吾母力也吾母之節弗彰吾曷人爲語畢嗚咽邑諸生感之爲述於有司旌其門有德叶坤貞語而保修不及見矣彌留時語不及他事唯以母爲



念卒年三十六

永泰縣志

卷十

孝友傳

二十九



論曰古聖王之治天下也有人治有天治以人治者法制禁令以輔天下之不及者也以天治者因天理之自然順民情之各足直之而塞乎兩間推之而放乎四海施之後世而不知其所終極蓋天地間有是當然而不易者結於心而不可解而非聖人之有所強於其間也夫無所強於其間者何曰父母也兄弟也父母兄弟之愛與有生以俱來卽孝父母友兄弟之情爲吾性所固有而君臣夫婦朋友之以義合者舉不足以方其萬一者也孩提之童無不知愛其親及其長也無不知敬其兄自汨沒於夫婦而孝友之念衰馳逐於朋友而孝友之念再衰熱中於君臣之際而孝友之念終衰日習爲浮薄之行而相率以成冒上無恥之俗者何可勝

道間有一二天性未漓者以身先之枕席不足戀同類莫能移好爵無可縻觀政於家不出家而成教猶之易牙治味不過雞鴨魚肉華陀用藥不過膏粘漆葉其勝人處不求之海外異國也一門之內雍雍怡怡而天地之所以不息國之所以立聖賢德業之所以可大可久胥本於是焉孝弟也者其務本之君子歟且夫君子之視膳問安非以爲孝也肩隨而齒列非以爲友也吾之於父母兄弟祇求自全吾心而視問隨列特文焉已耳苟其心之無憾也雖鞭撻譴訶之不變笑譏罵侮之不恤惟其心之不如是而遂已也則雖求之古人而無可疵質之天下後世而無可議而耿耿不自釋者終不以人言之無間自慰其內行之罔虧則常若有遺憾



者特其人其心日暮間而無憾者靡涯矣而又何悲焉

永泰縣志

卷十

孝友傳

三十一



忠義傳

食人之祿忠人之事殺身成仁舍生取義盡已謂忠蹇蹇匪躬集義所生其氣如虹家國安危友朋急難刀鋸不辭金石可貫為謀之誠任卹之敦以類相從謹識勿諉纂忠義傳第三十

宋

朱庭傑字世英崇寧五年進士建炎中為北海令攝濰州倅金人將犯闕官屬皆驚遁庭傑堅守不動城隅有水度寇至必飲因投以野葛飲者皆中毒死俄而監軍達辣引兵入庭傑與知州韓浩俱力戰死後錄其功勅葬於郡之桑溪原官其一子祀鄉賢(舊志)

盧榕字叔材初名郁宣和中擢第調安仁令紹興初劇寇曹成擁眾

永泰縣志

卷十

忠義傳

三十二

自江北掠湖南時帥臣向子諲駐兵安仁不滿千數俄而寇至榕乃躬率民兵轉戰而死高宗嘉其忠贈宣教郎官其子沂沂復與賊戰死又官其子鑄州倅黃輔之哭以詩曰許國一心如鐵勁闔門百口等毛輕祀鄉賢(參舊志通志)

黃復字乾叟寶慶二年進士

舊志作嘉定癸未進士

除山陽尉聞汀寇猖獗獻

廟堂三策境賴以安真德秀陳韓交薦之教授高郵軍改知興化

軍舊志知興化縣

興縣轉運通判滁州與守陳廣

閩書作陳廣中

協力拒虜廣西

門復北門射殺虜眾數千人後廣中礮死復守八十餘日援不至前後數百戰而歿在圍中遺子書云父老矣食君之祿繼之以死雖死猶生也總制趙葵餉臣吳潛上其事乞為立廟封忠壯侯著



書凡三十卷子厚廣皆從事郎(見萬姓統譜閩書)

林空齋失其名父同官至監丞空齋舉進士爲縣令解官家居張世傑立益王於泉州空齋率鄉人黃必大劉企祖開忠義局起兵復本縣北兵至必大企祖皆走空齋盛服坐堂嚙指血書壁云生爲忠義臣死爲忠義鬼草間雖可活吾不忍生爾諸君何爲者自古皆有死俄見執不屈而死(舊志)

黃裳與元兵戰爲所斬裳持頭就頸走至龜嶺遇老嫗問曰頭可續乎嫗曰不能遂仆鄉人立祠祀之(舊志)

明

柏真幼事昭武將軍王安安戰陣中瀕危者再以真力獲免嘗曰柏

永泰縣志

卷十

忠義傳

三十三

真掾吾不異吾子也令從姓王爲置田廬使家焉安子海南千戶端參侍舍人敏飫酒或冬月夜飲真必侍立執壺達旦或憫之答曰真賤人立慣何苦第郎君夜深酒多不爲福耳何憫真也其幾諫類此(見王氏家譜)

楊惟吉三十四都人洪武四年妖人溫九聚黨數百人暴戾橫行惟吉走赴都司請兵屢捕未獲惟吉奮勇先登冒重傷突入陣鄉人隨之乃獲溫九械繫赴藩司境內獲安有司以其事聞於朝賜鈔錠(參舊志通志)

林泰嘉靖三十八年倭奴卒至陷城郭及至泐口泰素以軍法部勒其佃客乃召三百人以衛鄉里(舊志)



林大有邑諸生嘉靖己未倭寇攻縣借邑令周煥堅守南門城破血戰死謝肇淛有林烈士傳祖母王氏年八十二父訓從父諫弟大蒙暨童僕數人同日以殉從祀周公祠(舊志參林氏家譜)

鄔俊字東橋嘉靖四十年菁賊與倭寇蹂躪城邑監司發兵議勦苦糗糧不給俊散家財詣軍門持糧給兵至明年盜盤踞不散俊曰賊輜重盈積挾之不前捨之不釋是以身殉貨也若得精銳數百人扼其要衝可盡覆也乃募勇士六百餘人請往擊賊直擣而前殺數十人賊稍退俊追擊至九龜林盜伏叢薄中刺以鎗死焉倭以俊牽制故緩於攻城奔莆田城保無虞者俊之力也監司以忠勇旌從祀周公祠今祀忠義祠(節錄舊志)

永泰縣志

卷十

忠義傳

三十四

林師稷字克農邑廩生崇禎十七年讀懷宗罪己詔感憤倡義於玉融兵勢稍振泊貝勒臨閩遣使招諭師稷辭使絕食自經子拱星亦起兵將會父於玉融聞父殉難慟哭絕而復甦服斬衰北面叩頭飲藥卒(舊志)

黃儒字三未天啓鄉薦崇禎間知營經縣以廉惠稱五載赴京舟遇暴客曰此黃營經母相犯也張獻忠攻營經城陷令儒屈膝懸其二妾於堂焚以脅之儒罵不絕口終不屈遂被磔妾林氏李氏皆死於焚(舊志)

鄔廷誨字蓋獻麟洋人崇禎乙卯歲貢廷對稱旨賜同進士授登封知縣下車甫三月李白成統衆猝至廷誨告邑民曰登封邑小援



絕安能禦方張之寇吾義當守死爾百姓可各逃去毋被屠戮爲也及流賊至以中嶽廟在城自成曾許愿脩造因委萬金囑廷誨代脩而去邑民間寇退皆還時飢饉尤甚廷誨以萬金買米賑卹賊聞之怒將亟攻屠廷誨度不保乃策馬馳入賊壘大呼曰守城者令也民何與焉對賊伏劍而死賊驚羅拜戒勿殘登民百姓哀之爲之殮葬歲時祀於墓下(舊志)

林汝載字克厚諸生崇禎末山寇陳乃孚刦掠民財知縣朱由榴率鄉勇勦捕遇害汝載同廩生張生白俱被執罵賊不屈死生白屍僵立不仆汝載妻方氏見賊勢猖獗卽自經僕林松冒險搶汝載屍回同方氏殯於一處長子爾高次子爾珍皆諸生爾高營葬畢

不食搯吭死僕林松殉焉爾珍痛一家遭難徒跣見靖南將軍趙子章乞師復仇適乃孚爲其黨所殺餘賊聞大兵至竄入延平邑賴以安(節錄林氏家譜)

鄔正畿字德都號皇州邑廩生少倜儻善屬文崇禎甲申正畿北面慟哭幾絕遂棄諸生遁跡深山作詩文見志自號亦必道人隆武建鼎福京詣闕下陳言授戶部司務命下再閱月而榕城不守作六哭歌又作男兒立志篇三十韻旋與友人林師稷集勤王兵未幾清兵至請援於莆而林已戰敗潛之江上作檠甜賦見志復與林子野錢希聲舉義王融時魯藩監國親督兵江上錢急薦正畿晉兵科給事中五上封事忤當事意投劾歸尋國事亦不濟正畿



憤惋殊至病五閱月始杖俄而清復分兵來永招諭使出正畿夜草疏千餘言冠帶北面跪宣賦絕筆詩與妻子永訣從容自經死所著有紫頂草內外編皆已刻行世未刻者曰萌茁草乾隆間與廷誨同賜諡節愍祀忠義祠(舊志參鄆氏家譜)

鄆正薊字德虞邑諸生正畿弟也崇禎甲申賦傷懷詩有何事野梟稱鳳舉可憐良玉並岡焚之句自投於月洲溪以死弟正重字德端倡義恢復敗於西林小溪口陣亡(舊志參鄆氏家譜)

鄆正衡字德銓又字阿平亦正畿弟爲邑諸生善詩古文與正畿齊名丙戌後正衡見兄三人先後皆以節終悲悼不勝作三愚合傳辛卯以積餼當貢不就試督學促之急正衡往受題不作文假寐

永泰縣志

卷十

忠義傳

三十六

至午書卷首曰青史不可沒忠孝本吾心遂起納卷督學憐之置不問出髡爲僧更名止行號蹇菴舊志以蹇菴爲菴名誤居小白渡作小白

渡志蒔藥課徒著詩文若干卷室人早卒不再娶無子以僧終(舊志參鄆氏家譜)

張白金號生白縣治高山人廩生陳乃孚將不利於永謀起事商於張張斥之力陳大義血淚交下不聽遂與陳絕陳憾之刺骨及倉卒變作及於難(見韋治雜錄)

林塗字子野崇禎癸未進士善草書爲人侃侃負氣節閩縣董應舉潭浦黃道周雲間夏允彝皆重之恆與握手慷慨談時事爲之嗟嘆而去授海寧令計擒邑妖人李三能等民德之建祠祀焉後值



鼎革全節而死著有居易堂詩集行世原籍福清遷永今祀永福忠義祠(舊志)

方餘字伯坤大樟人崇禎諸生博通羣書卓犖不羈見國步多艱有攬轡澄清之志棄諸生從戎平海寇累功授鉞分鎮浯嶼巡撫王某欲進攻東島餘謂當今神州陸沈生民塗炭明公將拯救撫勞之不暇顧乃闕遐荒之土擾鹿豕之羣妄冀有功是捨其腹心之疾而求諸膚髮也撫公怒以爲阻兵失機文致之下詔獄七年乃釋時荷蘭侵入浯嶼餘單騎臨諭之荷蘭素聞威望卽退歸東島錄功得復職餘赴闕上書指斥時事爲權要所抑不報寓燕邸十餘年痛奸邪之誤國憤懣莫可告語及聞妻妾二女相繼病歿遂

永泰縣志

卷十

忠義傳

三十七

南旋抵家未幾竟以坎壈不得志賫恨而卒妻呂氏妾周氏及二女皆能詩(舊志)

鄭文翥溪西人崇禎諸生授徒里中時靖南將軍趙子章及洪莽輩以恢復爲名殺人如麻鄭素爲趙洪所信仰爭致之以收人望始誘以利不赴繼刦以威不赴終搜掠其家聲言鄭來則免仍不赴如是者數四卒亦不敢加害(見韋治雜錄)

余國光字方彬邑諸生尙任俠有箐賊黃士華者刦掠村保擄余氏一族老幼且徇於衆曰若方彬一人出我免汝一族首領彬挺身出連罵黃賊數聲被害男名連名應爲父報讐不克亦被殺(節錄舊志)



趙子章邑武生鄭成功入閩授章靖南將軍清撫軍招之不肯降後被執不屈撫軍駭其貌與亡弟酷肖令中軍諭章拜爲兄弟章矢志不從遂棄市撫軍憫其忠義命葬之至今一都半嶺猶廟祀其像(舊志)

蔡喬衍有膂力善用戟重四十觔崇禎間山寇竊發蹂躪西鄉衍率衆禦之死於難

清

朱之屏字爾節長慶人慷慨任俠清初鼎革伏莽未靖行劫闖亭一帶遊客苦之之屏設法捕誅首惡匪患以除仙尤兩邑旅人不待勸募咸投錢立碑頌德不旬月而工竣

永泰縣志

卷十

忠義傳

三十八

張兆震字惟才以諸生累官游擊值海寇猖獗被擒欲降之兆震曰有死而已豈降賊哉遂遇害

黃美字西人邑諸生輕財仗義甲寅耿變賊首陳德元率衆攻縣美爲總練捐米飯衆夜則燃燈以備未嘗少懈城賴以安後耿逆勒餉誘以崇秩不受自經於雪峰寺(舊志)

周三赤岸王氏奴也幼鞠於王職司牧及掃除役勤慎無僞唯命是從未嘗有難色既長使治田園而田園治使治錢穀而錢穀不漁康熙十七年王之二子爲寇擄家人各鳥獸散周訴於省憲請兵殲焉二子因獲釋王感其義收爲義男爲娶室置產云(見王氏家譜)



江鴻汀字其蒙莒口人累官建勝兵船礮副光緒甲申中法構釁血戰陣亡贈武德騎尉入祀馬江昭忠祠世襲一子雲騎尉二代恩騎尉罔替叔廷儉兄大任均充建勝水手同時殉難奉旨附祀黃建勳白雲人少勇健以俠義稱言出人莫敢違由行伍起家累官北洋海軍左翼右營參將管帶超勇兵船光緒甲午大東溝禦倭卒於軍事聞奉旨賞加總兵銜以騎都尉世職弟乃釗超勇兵船槍礮教習同時陣亡賜卹

張可聖字文範任長福營參戎歿於王事弟可悅隨兄參贊軍務邑令知其才又素爲士卒所推服爲之詳請撫軍嗣厥職時值變故草寇四起可悅以滅賊爲己任幾死者數

民國

侯占箕號星南蓮峰人清季諸生尤德匪焰方熾占箕適辦鄉團遍聯大埔各保詳憲購礮置械日伺匪懈致匪怨滋深必得而甘心民國乙卯鄉人有通匪者匪遂入境燬侯居脅之去不屈被害



論曰自古家國危亡之慘必有忠於所事義不苟生者弗惜以一人之身爲千古綱常之寄非有迫於勢慕於名激於氣成仁取義其心安焉不必盡屬諸國君死社稷而臣死君之正也木有常春草有夏枯花有歛冬鳥有反舌蠋有戢羽其自適已事者吠堯固爲各主傷勇不妨過當以苟活爲羞以避難爲恥假非毅然守至死不變之操吾知破方以就圓求免於今之世者相環矣今夫平居里巷相慕悅交遊相徵逐詡詡焉慷慨以自期許謂士患感恩而未爲知己矣不然國士之報勿謂今世遂無古人也聞言者亦相與信之握手出肺肝相示指天日涕泣誓生死不相背負一旦以小睚眦各植其黨歎曲仇讐私函蠅集求稍踐前言而不可得

齊邱子曰澗松所以凌霜者藏正氣也美玉所以犯火者蓄至精也人果急君友之難奮不顧身吾不知其平居之自期許者奚若而視湯火之烈如重茵筦席之安視刀鋸鼎鑊之在前如登極樂之界視出生入死呼吸存亡觸白刃冒流矢義不反顧計不旋踵如遠遊之還鄉尙何震懼恐懼之有夫豈天地剛強正直之氣獨鍾於是耶無亦一時至性所流有不知其然而然者其於功名利祿也曾不若大節之足以榮其身而其畏刑戮之及也反不若譏笑怒罵之甚或苦戰而授命感憤以戕生殘骸暴於荒原凶問遲而不審甘之如飴沒世無傳而不悔固已卽幸而萬死一生忠肝義膽所激發亦凜然太華頽乎前不吾阻萬牛掣乎後不吾却者



所重在彼則所輕在此理勢然也然則世之朝秦暮楚者自謂通  
權達變識時務爲俊傑曾不知與眼前之厮役賤卒販夫賈豎之  
營營以生汶汶以死之同歸於泯盡也豈不哀哉

